

四庫全書

史部

欽定四庫全書

史部

直齋書錄解題卷十七

詳校官侍講學士臣法武善

編修臣程嘉謨覆勘

覆校官庶子臣鄒奕孝

校對官中書臣孫球

謄錄監生臣周雲翽

欽定四庫全書

直齋書錄解題卷十七

宋 陳振孫 撰

別集類中

趙韓王遺藁十卷

丞相韓忠獻王范陽趙普則平撰普開國元臣不以
文著而彗星班師二疏天下至今傳誦末有劉昌言
所撰行狀案館閣書目惟有奏議一卷今麻沙書坊
刊本奏議止數篇餘皆表狀之屬也

徐常侍集三十卷

左散騎常侍廣陵徐鉉鼎臣撰其二十卷仕河南所作餘十卷歸朝後所作也所撰李煜墓銘婉嫺有體文鑑取之

咸平集五十一卷

右諫議大夫漢嘉田錫表聖撰太平興國三年進士第二人范文正公誌其墓東坡序其奏議十篇所謂憂治世而危明主者也今首卷有奏議十二篇即東

坡所序

案此句原本脫去今據文獻通攷增入

錫之子孫亡顯者端平

初南充游似景仁為成都漕

案原本作為成憲今據文獻通攷改正

奏

言朝廷方用端拱咸平之舊紀元而臣之部內乃有

端拱咸平之直臣宜褒表之以示勸願下有司議諡

博士徐清叟直翁考功黃朴誠甫議諡曰獻翼云今

漢嘉田氏子孫不知存亡而文集板之在州者亦燬

於兵燼矣可為永慨

廣平公集一百卷

翰林學士文安公大名宋白太素撰

柳仲塗集十五卷

如京使大名柳開仲塗撰開開寶六年進士歷知常潤州以殿中侍御史換崇儀使又歷八郡以卒門人張景為行狀及集序本朝為古文自開始然其體艱澁為人忼慨喜功名急義史亦稱其傲狠強愎云

穆參軍集三卷

秦州司法參軍東平穆修伯長撰修祥符二年經明

行修進士仕不遇困窮以死師事陳搏傳其易學以授李之才之才傳邵雍而尹洙兄弟亦從之學古文且傳其春秋學或曰太極圖亦修所傳於陳搏种放者今其遺文傳世者僅如此門人祖無擇為之序

江南小集二卷

工部侍郎終南种放明逸撰淳化中有李介者序之於九江故以為名館閣書目別有正集十卷大畧與

此同

原註正集
名豹林

小畜集三十卷外集二十卷

知制誥濟陽王禹偁元之撰自為之序畧曰閱平生
所為文類而第之得三十卷將名其集以易筮之遇
乾之小畜象曰君子以懿文德未能行其施但可懿
文而已外集者其曾孫汾裒輯遺文得三百四十首
又有承明集十卷奏議集三卷後集詩三卷未見

宋

史藝文志無奏議集後
集詩而有別集十六卷

乖崖集十二卷附錄一卷

樞密直學士忠定公鄆城張詠復之撰

宋史詠字復之原本作

詠之誤
今改正

乖崖其自號也錢希白為墓誌韓魏公為神

道碑近時郭森卿宰崇陽刻此集舊本十卷今增廣并語錄為十二卷

武夷集二十卷別集十二卷

翰林學士文公浦城楊億大年撰案本傳所著括蒼武夷頽陰韓城退居汝陽蓬山冠黿等集及內外制刀筆共一百九十四卷館閣書目猶有一百四十六

卷今所有者惟此而已武夷新集者億初入翰苑當
景德丙午明年條次十年詩筆而序之別集者祥符
五年避讒佯狂歸陽翟時所作也君可思賦居其首
亦見本傳餘書疏皆作其弟倚酬答倚亦景德中進
士

中山刀筆集三卷

翰林學士大名劉筠子儀撰皆四六應用之文筠與
楊大年同時號楊劉詩號西崑體別有冊府應言集

十卷榮遇集十二卷表奏六卷浞川集四卷見館閣
書目

滑稽集四卷

翰林學士吳越錢易希白撰多謫諷之詞淳化癸巳

自序

擁旄集五卷伊川集五卷

案文獻通
攷作三卷

樞密使思公吳越錢惟演希聖撰易侔之子惟演倣
之子也惟演文集甚多此特其二集爾出鎮河陽河

南時所作也全集未見

臨川集三十卷二府集二十五卷年譜一卷

丞相臨淄元獻公臨川晏殊同叔撰其五世孫大正
為年譜言先元獻嘗自差次起儒館至學士為臨川
集起樞廷至宰席為二府集今案本傳有文集二百
四十卷中興書目亦九十四卷今所刊止此爾臨川
集有自序

夏文莊集一百卷

樞密使鄭國文莊公九江夏竦子喬撰竦父死王事
身中賢科工為文辭復多材術而不自愛重甘心姦
邪聲伎之盛冠於承平夫婦反目陰慝彰播皆可為
世戒也

呂文靖試卷一卷

丞相許國文靖公壽春呂夷簡坦夫撰咸平二年壽
州應舉此其程文也真本藏范太史氏前有家狀大
略與今同其所習曰春秋何論大義何論者當是何

晏論語也其所問各十條皆非深義逐條所答纔數句或止一言或直稱未審考官二人花書其上并批通不又禮行於郊賦建侯置守孰優論其所習又稱雜文時務策則不復存此可以見國初場屋事體文法簡寬士習純茂得人之盛後世反不能及文盛則實衰世變蓋可覩矣

范文正集二十卷別集四卷

參政文正公吳郡范仲淹希文撰祥符八年進士曰

朱說者即公也幼孤從其母適朱氏其為兗州推官始復姓更名

范文正尺牘五卷

其家所傳在正集之外

安陽集五十卷

丞相魏國忠獻公安陽韓琦稚圭撰

文潞公集四十卷補遺一卷

丞相介休文彥博寬夫撰

富文忠集二十七卷

丞相韓國文忠公河南富弼彥國撰奉使錄亦在其末

武溪集二十卷

集賢院學士襄公曲江余靖安道撰

徂徠集二十卷

國子監直講魯國石介守道撰集中有南京夏尚書啟及夫子廟上梁文皆為夏竦作此介所謂大姦之

去如距斯脫者也豈當是時竦之姦猶未著耶陸子
適刻於新定述其父放翁之言曰老蘇之文不能及
然世自有公論也歐公所以重介者非緣其文也

滄浪集十五卷

集賢校理蘇舜欽子美撰舜欽易簡之孫杜祁公衍
之堦坐進奏院用公錢會客為王拱辰輩所擠坐以
深文廢逐而死置園蘇州為滄浪亭水竹之勝冠於
吳下至今猶存嘗答韓持國書具見其意趣本傳載

之歐陽公序其文言子美之齒少於予而予學古文反在其後同時得罪者未幾復顯用舜欽獨先沒可哀也

宛陵集六十卷外集十卷

都官員外郎國子監直講宣城梅堯臣聖俞撰凡五十九卷為詩他文賦纔一卷而已謝景初所集歐公為之序外集者吳郡宋績臣所序謂皆前集所不載今考之首卷諸賦已載前集不可曉也聖俞為詩古

澹深遠有盛名於一時近世少有喜者或加毀訾惟
陸務觀重之此可為知者道也自世競宗江西已看
不入眼况晚唐卑格方錮之時乎杜少陵猶有竊議
妄論者其於宛陵何有

尹子漸集六卷

太常博士知懷州河南尹源子漸撰待制焞彥明其
孫也

尹師魯集二十二卷

案文獻通攷
作二十卷

直龍圖閣尹洙師魯撰源之弟也其父仲宣明經入仕父子皆歐陽公誌其墓洙與穆伯長同為古文范文正公為作集序歐公亦稱其文簡而有法以剛直數忤時卒以貶死死時精明不亂有過人者

書判一卷

尹洙撰洙天聖二年進士後以安德軍節推試書判拔萃科中之前十道是程文餘當為擬卷本朝惟余安道亦中是科集中有判詞二卷文鑑亦載一二又

有王回判二道而回不以此科進餘未有聞

宋元憲集四十四卷

丞相鄭國元憲公安陵宋庠公序撰本名郊字伯庠
天聖二年進士第一後有忌者讒之以姓符國號名
應郊天仁宗命改焉忌者之力止此後卒大用為名
臣

宋景文集一百卷

翰林學士景文公宋祁子京撰庠弟也自布衣名動

場屋號二宋天聖二年同登第祁本首唱章獻謂弟不可以先兄以為第十人而庠遂魁天下兄弟後皆貴顯景文清約莊重不逮其兄以此不至公輔所撰唐書列傳不稱良史景文筆記余於為文似蘧瑗年五十知四十九年非余年六十始知五十九年非其庶幾至於道乎每見舊所作文章憎之必欲燒棄梅堯臣喜曰公之文進矣景文未第時為學於永陽僧舍或問曰君好讀何書答曰余最好大誥故景文為

文謹嚴至修唐書其言艱其思苦蓋亦有所自歟

景案

文筆記以下原本俱脫
去今據文獻通攷增入

六一居士集一百五十二卷附錄四卷年譜一卷

參政文忠公廬陵歐陽修永叔撰本朝初為古文者
柳開穆修其後有二尹二蘇兄弟歐公本以辭賦擅
名場屋既得韓文刻意為之雖皆在諸公後而獨出
其上遂為一代文宗其集徧行海內而無善本周益
公解相印歸用諸本編校定為此本且為之年譜自

居士集外集而下至於書簡集凡十各刊之家塾其子綸又以所得歐陽氏傳家本乃公之子棐叔弼所編次者屬益公舊客曾三異校正益完善無遺恨矣居士集歐公手所定也

李泰伯退居類藁十二卷續藁八卷常語三卷周禮致太平論十卷後集六卷

太學說書南城李觀泰伯撰其自序曰天將壽我歟固為未足也不然斯亦足以藉手見古人矣類藁慶

歷所錄續藁皇祐所錄後集則門人傳野編秦伯不
喜孟子常語專辨之嘗舉茂材不中世傳閣試論題
有全不記所出者曰此必孟子注也擲筆而出

少微集三十卷

職方員外郎會稽齊唐祖之撰齊澣之後天聖八年
進士兩應制科皆為首選以切直報罷居鑑湖東北
去城五里名其山曰少微其集顧臨為之序

樂全先生集四十卷玉堂集二十卷

參政文定公南都張方平安道撰初舉茂材異等再
舉賢良方正皆中其科識略過人知蘇洵父子於布
衣惡王安石於考試進士之日皆人所不能及也壽
至八十五薨於元祐中於當時最為耆德然頗為司
馬溫公所不喜

胡文恭集七十卷

樞密副使文恭公晉陵胡宿武平撰晉陵之胡自文
恭始大其猶子宗愈仍執政子孫為侍從九卿者以

十數紹興初世將承公亦其後也至今猶名族

臨川集一百卷

案文獻通攷作一百三十卷

丞相荆國文公臨川王安石介甫撰後改封舒王方嘉祐以前名重一世迹其文學論議操守使不至大位則光明俊偉不可瑕疵矣老蘇曰使斯人而不用也則吾言為過而斯人有不遇之歎孰知其禍之至此哉何其知之明也

王魏公集二十卷

案宋史本傳不言安禮封魏國此稱魏公未詳

尚書左丞王安禮和甫撰近時厚之順伯其曾孫也
王校理集六十卷

祕閣校理王安國平甫撰安國雖安石親弟而意向
頗不合尤惡呂惠卿卒為所陷坐鄭俠事奪官歸田
里亦會惠卿方叛安石故也尋復之命下而卒

華陽集一百卷

丞相岐國文恭公龍舒王珪禹玉撰本成都人故稱
華陽典內外制十八年集中多大典冊詔令其詩號

至寶丹以其好為富貴語也在相位無所建明人目
為三旨於上前曰取聖旨曰領聖旨退謂吏則曰已
得旨元豐末命珪本無異論亦緣其備相位不能早
發大議依違遷延以召讒賊卒為本朝大禍需事之
賊也豈不然哉珪一身追貶不足道也

傳家集一百卷

丞相溫國文正公涑水司馬光君實撰生於光州故
名今光州有集本

丹淵集四十卷

集賢校理潼川文同與可撰東坡與之厚善墨君堂
記簣簞竹記皆為同作也司馬溫公稱其襟韻瀟灑
如晴雲秋月塵埃不到則其為人可知矣其為湖州
蓋未至而卒

蔡忠惠集三十六卷

案文獻通考
作十七卷

端明殿學士忠惠莆田蔡襄君謨撰近世始刻於泉
州王十朋龜齡為之序余嘗官莆至其居去城三里

荔子號玉堂紅者正在其處矮屋欲壓頭猶是當時
舊物歐公所撰墓誌石立堂下真蹟及諸公書帖多
有存者京卞同郡晚出欲自附於名閥自稱族弟本
傳云爾襄孫佃唱名第一京時當國以族孫引嫌降
第二佃終身恨之

元章簡玉堂集二十卷

參政章簡公錢塘元絳原之撰絳之祖德昭相吳越
本姓危氏臨川人唐末危全諷其伯父也德昭父曰

仔倡聚衆保鄉里兵敗自臨川奔杭州易姓元至今
建昌撫州邵武多危姓絳能文辭晚歲以王介甫薦
入翰林甚稱職遂柄用

呂正獻集三十卷

丞相東萊呂公著晦叔撰

劉狀元東歸集十卷

大理評事鉛山劉燁之道撰燁嘉祐四年進士第一
人堯舜性之賦至今人所傳誦始在場屋有聲文體

奇澁歐公惡之下第及是在殿廬得其賦大喜既唱
名乃輝也公為之愕然蓋與前所試文如出二人手
可謂速化矣仕止於郡幕年三十六以卒世傳輝既
黜於歐陽公怨憤造謗為猥褻之詞今觀楊傑志輝
墓稱其祖母死雖有諸叔援古誼以適孫解官承重
服又嘗買田數百畝以聚其族而餉給之蓋篤厚之
士也肯以一試之淹而為此儉薄之事哉

古靈集二十五卷

樞密直學士長樂陳襄述古撰襄在經筵薦司馬光而下三十三人皆顯於時紹興詔旨布之天下集序李忠定綱作也年譜載其世系出陳夷行之弟夷實自光州固始從王緒入閩家于福州攷之唐世系表有不合者嘗怪閩之士族推本家世輒言出自固始光在唐為下州固始又其一縣當時不聞顯人安得衣冠望族如許就令有之王緒以壽春屠者為盜王潮從之為部曲轉鬪萬里而後入閩士大夫何緣隨

逐不置蓋嘗思之王氏初建國人不自保護言鄉人幸其不殺後世子孫承襲其說世禩繇邈并與其初而忘之爾若陳氏尤不應云然當永嘉之亂林黃陳鄭四姓先入閩林諤為閩中記明著之矣尚得以一時脫死賊手之說守之而不變乎

鄖溪集五十卷

翰林學士安陸鄭獬毅夫撰皇祐五年進士首選坐知開封府不肯用案問新法為王安石所惡而出廷

試園丘象天賦時獬與滕甫俱有場屋聲甫賦首曰
大禮必簡園丘自然自謂人莫能及獬但倒一字曰
禮大必簡園丘自然甫聞之太服果居其次云

廣陵集二十卷

揚州布衣王令逢原撰令少年有盛名王介甫尤重
之年二十八而卒其妻吳氏安石夫人之女弟也守
志不嫁一女遺孕嫁吳師禮其子曰說所謂吳傳朋
也令之墓安石銘之

案原本作令之墓誌安石名之
據文獻通攷無誌字名作銘今

正改後有劉發者為之傳吳氏之墓其姪王雲銘之奉
使死磁州者也

公是集七十五卷

侍讀學士新喻劉敞仲達父撰號公是先生

彭城集六十卷

中書舍人劉敞叔贛父撰號公非先生敞兄弟俊敏
博洽同登慶歷六年進士第敞本首冠以內兄王堯
臣為編排官引嫌遂得第二人仕早貴而不永年年

財五十攸歷州縣二十年晚乃游館學元祐中始掌
外制敝子奉世仲馮亦有名官至執政世稱三劉

老蘇嘉祐集十五卷

文安主簿編修禮書眉山蘇洵明允撰洵初入京師
益帥張文定薦之歐陽公世皆知之而有雷簡夫者
為雅守以書薦之張歐及韓魏公尤力張之知洵由
簡夫世罕知之雷之書文亦慷慨偉麗可觀

東坡集四十卷後集二十卷內制集十卷外制集三卷

奏議十五卷和陶集四卷應詔集十卷

端明殿學士文忠公蘇軾子瞻撰一字和仲自謫黃州始號東坡居士杭蜀本同但杭無應詔集

欒城集五十卷後集二十四卷第三集十卷應詔集十

二卷

宋應詔集文獻通攷作二十卷

門下侍郎文定公蘇轍子由撰一字同叔欒城真定府縣也蘇氏望趙郡欒城元魏時屬趙郡故云晚居潁濱自號潁濱遺老故集或名

三蘇年表三卷

右奉議郎孫汝聽撰汝聽當是蜀人叙蜀甚詳

東坡別集四十六卷

坡之曾孫給事嶠季真刊家集於建安大畧與杭本同蓋杭本當坡公無恙時已行於世矣麻沙書坊又有大全集兼載志林雜說之類亦雜以頽瀆及小坡之文且間有訛偽勦入者有張某為吉州取建安本所遺盡刊之而不加攷訂中載應詔策論蓋建安本

亦無應詔集也

陳都官集三十卷

都官員外郎嘉禾陳舜俞令舉撰舜俞慶歷六年進士嘉祐四年制科以言新法謫官南康與劉凝之騎牛游廬山詩畫皆傳於世舜俞居湖秀境上初從安定胡先生學熙寧中六客其一也其墓在城南之蘓灣子孫猶宅於烏鎮

濂溪集七卷

廣東提刑營道周敦頤茂叔撰遺文纔數篇為一卷
餘皆附錄也本名敦實避英宗舊名改焉其仕以舅
鄭向任晚年以疾求知南康軍因家廬山前有溪取
營道故居濂溪名之二程所從學也又本并太極圖
為一卷遺事行狀附焉

明道集四卷遺文一卷

監察御史河南程顥伯淳撰三司使羽之後也其父
曰珦顥之沒文潞公題其墓曰明道先生

伊川集九卷

案文獻通攷作二十卷

宗政殿說書程頤正叔撰

河南程氏文集十二卷

二程共為一集建寧所刻本

元豐類藁五十卷續四十卷年譜一卷

中書舍人南豐曾鞏子固撰王震為之序年譜朱熹所輯也案韓持國為鞏神道碑稱類藁五十卷續四十卷外集十卷本傳同之及朱公為譜時類藁之外

但有別集六卷以為散逸者五十卷而別集所存其什一也開禧乙丑建昌守趙汝礪丞陳東得於其族孫澹者校而刊之因碑傳之舊定著為四十卷然所謂外集者又不知何當則四十卷亦未必合其舊也

曲阜集四十卷奏議十二卷西垣集十二卷外制集三

卷內制集五卷

崇文獻通攷西垣集作西掖集外制集三卷作三十卷內制集五卷作五十卷

翰林學士文昭公曾肇子開撰肇元祐中為西掖元符末再入故別名庚辰外制集肇制誥溫潤典雅其

草兄布拜相制汪玉山稱之以為得命次相之體

王直講集十五卷

天台縣令南城王无咎補之撰无咎嘉祐二年進士
曾鞏之妹夫從王安石游最久將用為國子學官未
及而卒為之誌墓曾鞏序其集云二十卷今惟十五
卷

南陽集二十卷

門下侍郎潁昌韓維持國撰封南陽郡公故以名集

沈晦元用其外孫也卷首載鮮于綽所述行狀而晦跋其後南澗元吉无咎其四世孫

無為集十五卷別集十卷

禮部郎濡須楊傑次公撰嘉祐四年進士元祐中為郎傑善談禪別集皆為釋老而釋又居十之九

清江三孔集四十卷

中書舍人新淦孔文仲經父禮部侍郎武仲常父戶部郎中平仲毅父撰寔先聖四十八世孫嘉祐六年

八年治平二年連三科兄弟以次登第文仲舉賢良
對策切直忤時罷舉官范鎮景仁因求致仕而制科
亦自此廢武仲為禮部第一人中甲科平仲亦嘗舉
制科其著述各數十篇多散逸弗傳今其存者文仲
纔二卷武仲十七卷平仲二十一卷而已慶元中濡
須王邁少愚守臨江哀輯刊行而周益公必大為之
序序畧曰遺文雖存一二於千百然讀之者知其為
有德之言非雕篆之習也昔黃太史頌當時人才有

曰二蘇聯璧三孔分鼎張丞相天覺在元符中詆元祐詞臣極其荒唐謂兩蘇為狂率則剛直也謂公兄弟配之文行如何哉

案序畧曰以下原本脫去今據文獻通考增入

西溪集十卷

翰林學士錢塘沈邁文通撰初以郊社齋郎舉進士第一執政謂已宦者不應先多士遂居其次實皇祐元年自是為故事文通吏事精明強敏為杭州開封府皆有能名從容閒暇夙興治事及午而畢卒時年

四十餘其孫晦元用宣和中亦魁天下

長興集四十一卷

翰林學士沈括存中撰括於文通為叔而年少於文通世傳文通常稱括叔今四朝史本傳以為從弟者非也文通之父扶扶之父同括之父曰周皆以進士起家官皆至太常少卿王荊公志周與文通墓及文通弟遵誌其伯父振之墓可攷括坐永樂事貶晚居京口自號夢溪翁自叙甚詳

雲巢集十卷

審官西院主簿沈遼獻達撰邁親弟也以兄任為京官坐法流貶事見揮麈錄自永徙池築室齊山號雲巢竟不復起以上三集刊於括蒼號三沈集其次序如此蓋未之攷也

蘇魏公集七十二卷

丞相魏國公溫陵蘇頌子容撰紳之子也紳在兩禁人稱其險詖而頌器局閎厚未嘗與人較短長其為

相在元祐末大臣奏事多稟宣仁獨頌必再以白哲
廟其後免於遷謫蓋上以為識君臣之禮故也年逾
八十薨於建中靖國之初自草遺表卻醫屏藥死生
之際了然集前後序汪藻周必大撰

傅獻簡集七卷

中書侍郎獻簡公河陽傅堯俞欽之撰

赤城集十卷

兩浙提刑寧海羅適正之撰治平二年進士學於四

明樓郁為吏健敏頗為蘇子瞻劉貢父諸公所知台
士有聞於世自適始

西塘集二十卷

監安上門三山鄭俠介夫撰治平四年甲科小臣劇
上言人所不敢言上為之感動略施行其言不惟不
怒而已既而竟墮深譴良由呂惠卿欲傾王安石而
俠與安國游從厚善遂起獄併陷之俠既得罪新法
遂不罷而本朝之禍本成矣小人勿用之戒可不畏

哉安石親惠卿而疎俠豈惟誤國亦以危身後之君子可以鑒矣

范忠宣集二十卷

丞相忠宣公吳郡范純仁堯夫撰文正公之次子也
文正子四人長純佑尤俊有賢行早年病廢以死富
丈忠誌其墓近時吏部尚書之柔者其四世孫也次
純禮純粹皆顯用至大官

劉忠肅集四十卷

丞相忠肅公東光劉摯莘老撰凡四舉於鄉試禮部
為第一登嘉祐四年甲科劉元城為集序述其出處
大槩

畫墁集一百卷

吏部侍郎邠國張舜民芸叟撰舜民初用於元祐至
元符末為諫議大夫居職七日所上事六十章崇寧
初坐謝表言紹聖逐臣有曰脫禁錮者何止一千人
計水陸者不啻一萬里又曰古先未之或聞畢竟不

知其罪以為譏謗坐貶自號浮休居士

淇水集八十卷

門下侍郎大名李清臣邦直撰清臣韓魏公姪壻

原梁

本無姪字攷宋史本傳韓琦以兄女妻之蓋姪壻也今補正

治平二年中制科歐

陽公愛其文以比蘇軾其為人亦寬博有度而趨時嗜權利首主紹述之論意規宰相亦卒不如其志

范太史集五十五卷

翰林學士成都范祖禹淳甫撰

灌園集三十卷

鄉貢進士呂南公次儒撰淳熙初試禮部不利會以
新經取士遂罷舉欲修三國志題其齋曰袞斧書將
成而死其書亦不傳元祐初諸公欲薦進之不及

伐檀集二卷

案文獻通
攷作一卷

知康州豫章黃庶亞夫撰自為序庭堅其子也世所
傳山魃水怪著薜荔之詩集中多此體庭堅詩律蓋
有自來也庶慶歷二年進士

豫章集五十卷

案文獻通攷作三十卷

外集十四卷

著作郎黃庭堅魯直撰自號山谷道人

豫章別集二十卷

案文獻通攷作一卷

皆集中所遺者如承天塔記黃給事行狀毀壁其顯顯者也諸孫當子耕集而傳之

宛丘集七十卷年譜一卷

起居舍人樵國張耒文潛撰宛丘陳州其所居也蜀

本七十五卷

后山集十四卷外集六卷談叢六卷理究一卷詩話一卷長短句二卷

祕書省正字彭城陳師道無已撰一字履常蜀本但有詩文合二十卷案魏衍作集序云離詩為六卷類文為十四卷今蜀本正如此又言受其所遺甲乙丙藁詩曰五七文曰千百今四明本如此此本劉孝題刊於臨川云未見魏全本仍其舊十四卷為正集蓋不知其所謂十四卷者止於文而詩不與也外集詩

二百餘篇文三篇皆正集所無談叢詩話或謂非后山作后山者其自號也

淮海集四十卷後集六卷長短句三卷

祕書省正字高郵秦觀少游撰一字太虛觀才極俊
嘗應制舉不得召終以疎蕩不檢見薄於世後亦不
免貶死

雞肋集七十卷

吏部員外郎鉅野晁補之无咎撰

濟南集二十卷

鄉貢進士華山李廌方叔撰又號月巖集東坡知貢
舉得試卷以為廌也置之首選已而不然賦詩自咎
有平生漫說古戰場過眼方迷日五色之句後竟不
第

豫章集四十四卷宛丘集七十五卷后山集二十卷淮
海集四十六卷濟北集七十卷濟南集二十卷

蜀刊本號蘇門六君子集

何博士備論四卷

武學博士浦城何去非正通撰去非以累舉對策稱
旨授左班殿直教授武學後以東坡薦授承奉郎司
農寺丞通判廬州別有文集二十卷未見

呻吟集一卷

原武邢居實敦夫撰恕之長子幼有俊才名聲藉甚
一時前輩皆愛之年十九而卒宣仁之誣謗恕為之
也居實未死或能當不義而爭萬一有補於世道是

以諸賢尤痛惜焉晁以道追為其墓表尤反覆致意
姑溪集五十卷後集二十卷

朝請大夫趙郡李之儀端叔撰嘗從東坡辟中山幕
府後代范忠宣作遺表為世傳誦然坐是得罪編置
當塗遂居焉其弟之純官至尚書

大名集四十卷

簽書樞密魏郡王巖叟彥霖撰韓魏公客也

錢塘韋先生集十八卷

主客郎中錢塘韋驥子駿撰驥皇祐五年進士元祐中以近臣薦為監司數路知明州以左朝議大夫致仕崇寧中乃卒少以辭賦有聲場屋王荊公喜其偕著賦頗稱道之陳師錫誌其墓

強祠部集四十卷

三司戶部判官餘杭強至幾聖撰亦韓魏公客也在幕府表章書記多出其手曾南豐作集序稱其文備古今體兼人所長云

節孝集二十卷

楚州教授山陽徐積仲車撰治平四年進士以耳聾不能仕事其母極孝行義純篤古所謂卓行也東坡謂其文詩怪而放如玉川子

案東坡句原本節去今據文獻通攷增入

政

和中賜諡節孝處士

樂靜集三十卷

起居舍人鉅野李昭玘成季撰

案成季原本作成孝文獻通攷作季成俱

誤今據宋史本傳改正

元豐二年甲科所居有樂靜堂故以名

集其姪邴漢老為書其後

學易集二十卷

朝奉郎東光劉跂斯立撰忠肅公摯之長子也與其弟蹈同登元豐二年進士第元祐初以其父在言路政府不得用紹聖以後復坐黨家連蹇終其身晁景迂誌其墓比孫明復石守道之徒為文無所不長宣防宮賦學易堂記世傳誦之

田承君集三卷

大宗正丞陽翟田晝承君撰

案晝原本作晝誤今晝
據宋史本傳改正

樞密況之侄也與鄒道鄉善鄒之貶晝曰願毋以此
舉自滿士所當為者未止此也

道鄉集四十卷

吏部侍郎晉陵鄒浩志完撰浩既諫立楊后坐貶徽
宗初召還對上首及之獎歎再三問諫草安在曰焚
之矣退告陳瓘瓘曰禍其始此乎異時姦臣妄出一
緘則不可辨矣蔡京素忌之使其黨作偽疏言劉后

殺卓氏而奪其子遂得罪其在昭州作青詞告上帝
有追省當時奏御之三章初無殺母取子之一字云
婆婆集三十卷

右正言陽翟崔鷗德符撰鷗坐元符上書邪等廢於
家治圃號婆婆靖康初召為諫官力論馮澥之罪

案澥

原本作辦誤今據
宋史本傳改正

忽得孿疾不能行而卒無子其壻

衛昂哀輯其遺文

滴水集四十卷

集英殿修撰長安李復履中撰元豐三年進士

案文獻通

政作

二年博學有氣節其為熙河漕有旨造戰艦戰車復

奏斥議者之謬妄以為兒戲遂罷其役時論韙之

馬子才集八卷

鎮南節度推官鄱陽馬存子才撰元祐三年進士第

四人

崇福集三十五卷四六集十五卷

朝請郎晁詠之之道撰景迂弟也為作集序詠之初

以廢為揚州法曹未上時東坡守揚族兄无咎為倅

以其文呈東坡及至揚

案此句原本云坡方守揚今據文獻通攷改正

詠之

具參軍禮趨謁坡走下庭攜手以上謂坐客曰此奇才也紹聖元年登第繼中詞科坐元符邪等罷廢後奉崇福祠故以名集

陶山集二十卷

尚書左丞山陰陸佃農師撰

東堂集六卷詩四卷書簡二卷樂府二卷

祠部郎江山毛滂澤民撰滂為杭州法曹以樂府詞
有佳句受知於東坡遂有名嘗知武康縣縣有東堂
集所以名也又嘗知秀州修月波樓為之記其詩文
視樂府頗不逮

溪堂集二十卷

臨川謝逸無逸撰

竹友集十卷

臨川謝邁幼槃撰逸從弟也呂居仁題其後曰逸詩

似康樂邁詩似元暉

了齋集四十二卷

宋文獻通攷
作三十卷

司諫延平陳瓘瑩中撰汪應辰為集序以為出死力
攻權姦者天下一人而已矣非虛語也

約論十七卷

陳瓘撰起戰國至後漢安帝蓋讀通鑑隨事有所發
明者也

浮沚先生集十六卷後集三卷

祕書省正字永嘉周行已恭叔撰十七入太學有盛
名師事程伊川元祐六年進士為太學博士以親老
歸教授其鄉再入為館職復出作縣永嘉學問所從
出也鄉人至今稱周博士集序林越撰言為祕書郎
則不然先祖妣先生之第三女先君子其自出也故
知其本末所居謝池坊有浮沚書院

斜川集十卷

通直郎蘇過叔黨撰世號小坡坐黨家不得仕進終

於通判中山府晁以道誌墓稱其純孝給事中嶠其
孫也

九峰集四十卷

太常少卿眉山蘇元老在廷撰東坡從孫也坡在海
上嘗有書往來其罷奉常歸潁昌正坐元祐邪說未
幾遂卒年四十七

清真集二十四卷

徽猷閣待制錢塘周邦彥美成撰元豐七年進汴都

賦自諸生命為太學正邦彥博文多能尤長於長短句自度曲其提舉大晟府亦由此既盛行於世而他文未傳嘉泰中四明樓鑰始為之序而太守陳杞刊之蓋其子孫家居於明故也汴都賦已載文鑑世傳賦初奏御詔李清臣讀之多古文奇字清臣誦之如素所習熟者乃以偏傍取之爾鑰為音釋附之卷末

清真雜著三卷

邦彥嘗為溧水令故邑有詞集其後有好事者取其

在邑所作文記詩歌併刻之

寶晉集十四卷

禮部員外郎襄陽米芾元章撰其母閭氏與宣仁后在藩時有舊故以后恩補試銜入仕其上世皆武官蓋國初勲臣米信之後也視芾為五世孫酷嗜古法書家藏二王真蹟故號寶晉齋蓋由得謝東山二王各一帖遂刊置無為而名齋云

玉池集十二卷

考功郎湘陰鄧忠臣慎思撰熙寧三年進士坐元符
黨廢不用言者論其議范忠宣謚過實又坐罰銅崇
觀間卒平生著述至多嘗和杜詩全帙又嘗獻郊祀
慶成賦及原廟詩百韻裕陵喜之擢為館職今皆軼
弗傳所存一二而已玉池其所居山峯名

橘林集十六卷後集十五卷

密州教授石忌敏若撰崇寧壬午以同進士出身中
詞科其文雕琢怪奇殊乏蘊藉壓卷策問言王金陵

配饗先聖事謂其以百聖芻豢甘四海口以六經河
漢洗四海心以九達夷路破四海迷以萬金良藥起
四海病讀之不覺大笑其人與文皆不足道也集僅
二冊而卷數如此麻沙坊本往往皆然

龍雲集三十二卷附錄一卷

著作佐郎廬陵劉弇偉明撰元豐進士紹聖詞科曾
慥詩選以比石敏若非其倫也龍雲安福縣鄉名弇
所居也

唐子西集二十卷

宋文獻通考
攷作十卷

宗學博士眉山唐庚子西撰張商英拜相庚作內前行後坐貶惠州歸蜀而卒其文長於論議所著名治存舊正友議賞諸論皆精確

東觀餘論二卷

宋文獻通考
攷作三卷

秘書郎昭武黃伯思長睿撰伯思右丞黃履之孫吳園張根之壻於李忠定綱為中外襟袂故忠定誌其墓伯思元符庚辰進士年四十而卒好古博雅喜神

仙家言自號雲林子別字霄賓有集一百卷此書止
法帖刊誤及序跋古書畫器物故名餘論

北湖集十卷長短句一卷

直秘閣知虢州富川吳則禮子副撰其父中復以孫
忬薦為御史不求識面臺官者也中復弟幾復嗣復
子立禮及嗣復子審禮皆登科有名譽則禮以父澤
入仕晚居豫章自號北湖居士

劉左史集四卷

起居郎永嘉劉安節元承撰與從弟安上皆嘗事二
程同游太學號二劉安節元符三年進士為察官左
史晚知宣州以沒

箕穎集二十卷

穎昌曹組元寵撰組本與兄緯有聲太學亦能詩文
而以滑稽下俚之詞行於世得名良可惜也謝克家
任伯為集序其子勛跋其後略見其出處蓋宣和三
年始登第郊禮進祥光賦有旨換武階兼閤職詔中

書召試仍給事殿中未幾而卒然集中有謝及第啟
自序云蚤預諸生竟叨右列則未第之前已在西班
未知何以也曾慥詩選云六舉不第宣和中詔赴廷
試賜第啓中所謂特舉孱微許從俊造慥之言良是
序跋不著其實爾

梅文安集十五卷

戶部尚書浦江梅執禮和勝撰執禮死於靖康之禍
人固哀其不幸而不知吳革趙子昉之謀執禮實主

之事既泄范瓊殺草徐秉哲以子昉遺金金知執禮
預謀以根括金銀為罪問誰為長官意在執禮也安
扶恐其坐之進曰皆長官也遂俱死文安者所封開
國縣也

李忠愍集十二卷

吏部侍郎臨洺李若水清卿撰後二卷為附錄其死
事時財三十五歲本名若冰以靖康出使改今名詩
文雖不多而詩有風度文有氣槩足以知其所存矣

夷白堂小集二十卷別集三卷

考功員外郎括蒼鮑慎由欽止撰元祐初以任子試吏部銓第一復登六年進士乙科甫脫選即為郎然自是數坐累官竟不進其父粹始居吳故葬於吳興

清溪集十卷附錄一卷

案文獻通攷清作青

楚州教授臨川汪草信民撰紹聖四年試禮部第一遂登甲科蔡京當國召為宗子博士力辭不就年財四十卒呂原明誌其墓晁以道為辭以哀之草嘗有

言曰咬得菜根則萬事可做誠名言也

玉溪集二十二卷

左司員外郎永嘉倪濤巨濟撰其父始徙居廣德濤
大觀三年進士燕山之役誦言其非以沮軍罷謫衡
州茶陵以死年三十九呂居仁誌其墓曾吉父為作
集序

竹隱畸士集四十卷

右文殿修撰韋城趙鼎臣承之撰元祐甲科紹聖宏

詞又自號葦溪翁其孫綱立刊於復州本百二十卷
刊止四十卷而代去遂止

傅忠肅集三卷

待制濟源傅察公晦撰堯俞從孫也宣和七年以吏
部郎接伴金使金人入寇使人不來為敵驅去幹里
布脅使拜不屈見殺

丁永州集三卷

知永州吳興丁注葆光撰元豐中余中榜進士喜為

歌詞世所傳催雪無悶及重午慶清朝皆有承平閒雅氣象有女適樂清令富春李素見素寔先妣之大父母也

石門文字禪三十卷

僧高安喻德洪覺範撰一作惠洪其在釋門得法於真淨克文而於士大夫則與黨人皆厚善誦習其文得罪不悔為張商英陳瓘鄒浩尤盡力其文俊偉不類浮屠語韓駒子蒼為塔銘云爾

[illegible]

直齋書錄解題卷十七

欽定四庫全書

史部

直齋書錄解題卷十八

九

詳校官侍講學士臣法式善

編修臣程嘉謨覆勘

覆校官庶子臣鄒奕孝

校對官中書臣孫球

謄錄舉人臣郭履元

欽定四庫全書

直齋書錄解題卷十八

宋 陳振孫 撰

別集類下

演山集六十卷

端明殿學士延平黃裳冕仲撰元豐二年進士第一人貴顯於崇觀死於建炎年八十有七方三舍法初行裳謂宜近不宜遠宜少不宜老宜富不宜貧不如遵祖宗科舉之制世傳以為口實

景迂集二十卷

徽猷閣待制晁說之以道撰又本止刊前十卷說之平生著述至多兵火散逸其孫子健哀其遺文得十二卷續廣之為二十卷別本刊前十卷而止者不知何說也劉跂斯立墓誌景迂所撰見學易集後而此集無之計其逸者多矣說之元豐五年進士元祐初蘇文忠范太史曾文昭皆薦之坐元祐邪等廢棄靖康末始為從官卒於建炎三年慕司馬溫公為人自

號景迂生

龜山集二十八卷

工部侍郎延平楊時中立撰時及從明道死當建炎四年年八十有七於程門最為壽考

梁谿集一百二十卷

丞相忠定公昭武李綱伯紀撰父夔進士起家至右文殿修撰黃右丞履之甥也綱娶吳園先生張根之女亦右丞外孫梁谿名集者修撰葬錫山忠定嘗廬

墓云

襄陵集二十四卷

尚書右丞襄陵許翰崧老撰元祐三年進士靖康初
入西府建炎為丞轄與黃潛善輩不合而去

後湖集十卷

丹陽蘇庠養直撰其父堅伯固亦有詩名庠以遺澤
畀其子而自放江湖間東坡見其清江曲大愛之由
是得名僧祖可正平號癩可者其弟也庠中子扶亦

工詩有清苦之節庠紳之後頌之族

初寮集四十卷後集十卷內外制二十四卷

尚書左丞中山王安中履道撰安中年十四薦於鄉
凡四舉乃登第為中司受旨攻蔡京京子攸入禁中
日夕泣涕告于上安中亟改翰苑事遂止其自政府
出守燕京父子排之也然安中之進亦本由梁師成
始東坡帥定武安中未弱冠猶及師事焉未卒業而
坡去其後晁以道為無極令安中既第修邑子禮用

長牋自言以新學竊一第為親榮非其志也以道曰
為學當謹初何患不遠到安中築室榜曰初寮其議
論聞見多得於以道既貴顯遂諱晁學但稱成州使
君四丈無復先生之號矣甚哉籍是不畔之難也

劉給事集五卷

給事中劉安上元禮撰紹聖四年登第歷臺諫掖垣
瑣闥以次對歷三郡而終集中有彈蔡京疏

橫塘集三十卷

尚書右丞瑞安許景衡少伊撰亦嘗從程氏學建炎
初為執政與黃汪不合罷建議渡江幸建康言者以
為非是及下還京之詔景衡以憂卒於瓜洲未幾敵
騎奄至淮揚倉卒南渡

章貢集二十卷

秘書監章貢李朴先之撰紹聖元年進士坐言隆祐
之賢廢三十年蔡京欲強致之不屈靖康建炎之間
半歲五遷而病不能行以死其教授西京國子監也

程伊川與之甚厚然謂其太直以洛中風波為戒朴
笑曰不意此言發于先生之口伊川為之改容愧謝
其風節可畏也

歐陽修撰集六卷

崇仁布衣贈秘閣修撰歐陽澈德明撰澈死時年三
十一環溪吳沆哀其詩為飄然集三卷而曾稽胡衍
晉遠取其所上三書併刻之臨川倅廨

空青遺文十卷

直寶文閣南豐曾紆公衮撰紆布之子有異材建中
靖國初布在相位奉詔為景靈西宮碑紆之筆也建
炎紹興之際將漕江浙入為司農少卿知信衢州以
卒汪彥章誌其墓孫仲益序其文王銍性之其壻也
石林總集一百卷年譜一卷

尚書左丞吳郡葉夢得少蘊撰紹聖四年進士崇觀
間驟貴顯三十一歲掌外制次年遂入翰林中廢至
建炎乃執政然財數日而罷平生所歷州鎮皆有能

聲胡文定安國嘗以其蔡潁南京之政薦于朝謂不當以宿累廢晚兩帥金陵當烏珠臨江移三山平羣寇其功不可沒也秦檜秉政欲令帥蜀辭不行忤檜意以崇慶節度使致仕其居在下山奇石森列藏書數萬卷旣沒守者不謹屋與書俱燼于火石林二字本出楚辭天問

石林建康集十卷

皆帥建康時詩文其初以所莅官各為一集後其家

編次總而合之此集其一也

石林審是集八卷

其門人盛光祖子紹所錄亦已入總集

浮溪集六十卷

翰林學士婺源汪藻彥章撰四六偶麗之文起於齊梁歷隋唐之世表章詔誥多用之然令狐楚李商隱之流號為能者殊不工也本朝楊劉諸名公猶未變唐體至歐蘇始以博學富文為大篇長句叙事達意

無艱難牽強之態而王荊公尤深厚爾雅儷語之工
昔所未有紹聖後置詞科習者益衆格律精嚴一字
不苟措若浮溪尤其集大成者也

翟忠惠集三十卷

參政丹陽翟汝文公巽撰汝文制誥古雅多用全句
氣格渾厚近世罕及夫人邢氏怨之女居實其弟也
長子耆年寔邢出好古博文高尚不仕忠惠者私諡
也

鴻慶集四十二卷

戶部尚書晉陵孫覲仲益撰大觀三年進士政和四年詞科代高麗謝賜燕樂表膾炙人口生元豐辛酉卒乾道己丑蓋年八十有九可謂耆宿矣而其平生出處至不足道也嘗提舉鴻慶宮故以名集

呂忠穆集十五卷

丞相濟南呂頤浩元直撰後三卷為燕魏錄雜記古今事卷末言金人敗盟始末甚詳

忠正德文集十卷

丞相聞喜趙鼎元鎮撰四字高廟所賜宸翰中語也
北山小集四十卷

中書舍人信安程俱致道撰俱父祖世科而俱乃以
外祖鄧潤甫蔭入仕宣和中賜上舍出身為南宮舍
人紹興初入西掖徐俯為諫議大夫封還詞頭罷去
後以次對修史病不能赴而卒

陵陽集五十卷

中書舍人仙井韓駒子蒼撰自幼能詩黃太史稱其
超軼絕塵蘇文定以比儲光羲游太學不第政和初
獻書召試賜出身後入西掖坐蘇氏鄉黨曲學罷

丹陽集四十二卷後集四十二卷

顯謨閣待制江陰葛勝仲魯卿撰紹聖四年進士元

符三年詞科洪慶善序其文有所謂絕郭天信

案郭天信

見宋史方技傳原本作大信誤今改正

拒朱勔慙盛章而怒李彥者蓋

其平生出處之畧也再知湖州後遂家焉

尹和靖集一卷附集一卷

徽猷閣待制河南尹焞彥明撰子漸之孫年十九舉進士策問欲誅元祐黨籍不對而出遂罷舉靖康賜號和靖處士敵陷洛陽闔門遇害死而復蘇門人潛載以逃客涪州以范元長薦入經筵擢列侍從葬會稽山

綦北海集六十卷

翰林學士北海綦密禮叔厚撰工於四六秦檜初罷

相室禮當制有御筆詞頭藏其家檜再相下台州追索時室禮已死幸不及禍

雲龕草堂後集二十六卷

參政鉅野李邴漢老揆明受之變以兵部侍郎直學士院叱責克渠朝廷賴焉旣復辟首擢執政周益公作神道碑言前後集一百卷今惟後集蓋皆南渡後所作也朱文公為之序漢老樂靜右史之姪五世祖濤五代時宰相石晉之亂弟澣在翰林陷于敵及邴

立節于建炎而其弟鄴守會稽亦隨金人北去世以
為異

龜谿集十二卷

知樞密院忠敏吳興沈與求必先撰建炎紹興之間
歷三院翰苑以至執政嘗奏言王安石之罪大者在
于取揚雄馮道當時學者惟知有安石喪亂之際甘
心從偽無仗節死義之風實安石倡之此論前未之
及也紹興七年終于位

胡忠獻集六十卷

案文獻通考題胡承公集
十卷資古紹志集十卷

端明殿學士晉陵胡世將承公撰文恭公宿之曾孫
以兵部侍郎為川陝副宣金人敗盟繼吳玠之後經
畫守禦以迄和議再成分疆未定死于河池世將好
古博雅有資古紹志錄倣集古錄跋尾亦見集中謚

忠獻

案謚忠獻句原本脫去
今據文獻通攷增入

胡文定公武夷集十五卷

給事中崇安胡安國康侯撰紹聖四年進士第三人

仕四十年實歷不及三載著春秋傳行于世本喜為
文後篤志于學乃不復作其辭名試曰少習藝文不
稱語妙晚捐華藻纔取理明既覺昨非更無餘習故
其文集止此

毗陵集五十卷

參政文靖毗陵張守全真撰一字子固

案子固原本作子同誤今

據宋史本傳改正

崇寧進士詞科紹興執政張魏公在相位

薦秦檜再用守有力焉一日與魏公言某誤公聽今

朝夕同班列得款曲其人似以曩者一跌為戒有患
失心宜自効謝上魏公為作墓志著其語

張章簡華陽集四十卷

參政金壇張綱彥正撰大觀中舍法三中首選釋褐
為承事郎辟雍正蓋專于新學者紹興初在瑣闥忤
張俊求去復與秦隙遂引年秦亡乃召用乾道初年
八十四而終自號華陽老人華陽者茅山也

非有齋類藁五十卷

給事中吳興劉一止行簡撰宣和三年進士居瑣闥
僅百餘日忤秦檜罷去閒居十餘年以次對致仕檜
死被召力辭進雜學士而終年八十二實紹興庚辰
竹西集十卷西垣集五卷

兵部侍郎維揚王居正剛中撰宣和三年進士紹興
初入詞掖西垣集者制草及繳章也其篇目凡繳章
皆云封還詞頭蓋其子孫編次者之失也除授則有
詞頭政刑庶事何詞頭之有

張巨山集三十卷

中書舍人光化張嶧巨山撰嶧為司勳郎官金人再
取河南秦相惶恐上章引伊尹善無常主及周任不
能者止之文以自解嶧之筆也秦德之遂擢修注掌
制而其具藁倉卒誤以伊尹告太甲為告湯及周任
之言為孔子自言時秘書省寓傳法寺有書其門曰
周任為孔聖太甲作成湯秦疑諸館職為之多被逐
然嶧亦以答檜三折肱之語謂其貳于已無幾亦罷

默成居士集十五卷

中書舍人潘良貴子賤撰一字義榮剛介之士也朱
侍講序其集畧見其出處大致

默堂集二十二卷

案文獻通攷
作二十卷

宗正少卿延平陳淵知默撰一字幾叟了翁之姪孫
楊龜山門人紹興初嘗為諫官

筠谿集二十四卷

戶部侍郎連江李彌遜似之撰

案遜原本作聖文獻
通考作遠俱誤今據

宋史
改正

大觀三年上舍第一知冀州能抗金敵攝江東

帥與李忠定平周德之亂晚為從官沮和議坐廢而

終

鄱陽集十卷

徽猷閣直學士鄱陽洪皓光弼撰皓奉使金國守節
不屈既歸為秦所忌謫英州死之日與秦適相先後
三子登詞科俱貴顯

東窓集四十卷

中書舍人鄱陽張廣彥實撰與呂居仁為詩友其在
西掖當紹興十一年

雪谿集畧八卷

汝陰王銍性之撰國初周易博士昭素之後也其父
萃樂道嘗從歐公學銍為曾紆婿嘗撰七朝國史紹
興初嘗同子正薦之詔視秩史官給札奏御會秦氏
柄國中止書竟不傳其子明清著揮麈錄

致堂斐然集三十卷

禮部侍郎胡寅明仲撰文定公長子也本其兄子初
生棄不舉文定于水盆內收育之既長俾自絕于本
生不為心喪止服世父之服寅遵行之集中有與秦
丞相書言之甚詳人倫之變古今所未有也寅宣和
初進士紹興初已為從官不主和議秦本與其父子
有契分竟謫新州檜死北歸沒於岳州

五峯集五卷

右承務郎胡宏仁仲撰文定季子不出仕篤意理學

南軒張栻其門人也別本不分卷

竹軒雜著十五卷

太常少卿永嘉林季仲懿成撰以趙元鎮薦入朝奏
疏沮和議得罪仲熊叔豹季狸其弟也皆知名

北山集三十卷

端明殿學士金華鄭剛中亨仲撰紹興二年進士亞
魁受知秦相擢使川陝後忤意貶死封州

澹庵集七十八卷

端明殿學士忠簡廬陵胡銓邦衡撰建炎甲科第五
人既上書乞斬秦檜謫嶺海秦死得歸孝宗即位始
復官名用又以沮再和之議得罪去乾道中入為丞
郎亦不容于時奉祠至淳熙七年乃終年七十有九
相山集二十六卷

朝奉大夫濡須王之道彥猷撰宣和六年兄弟三人
同登科建炎寇亂率衆保明避山從之者皆得免以
功改京官沮和議得罪晚乃歷麾節其子蘭被遇阜

陵貴顯

韋齋小集十二卷

吏部員外郎新安朱松喬年撰侍講文公之父也文公嘗言韋齋先生自為兒童時出語已驚人及去場屋始放意為詩文其詩初亦不事彫飾而天然秀發格律閒暇超然有出塵寰之趣

案文公嘗言以下原本脫去今據文獻通

攷增

入

關博士集二十卷

太學博士錢塘關注子東撰紹興五年進士嘗為湖州教授自號香巖居士

石月老人集三十五卷

朝議大夫致仕鄱陽余安行勉仲撰安行累舉不第其子應求以童子登崇寧五年進士科為御史歷麾節所至迎養其父至九十六乃終著書號至言蓋純篤之士也

王著作集四卷

著作佐郎福清王蘋信伯撰從程門學以趙忠簡薦
召對賜出身秦檜惡之會其族子坐法牽連文致奪
官以死

屏山集二十卷

通判興化軍崇安劉子翬彥沖撰父齡兄子羽子翬
以廕入仕年甫四十八而卒朱文公其門人也嘗謂
朱曰吾少聞佛老之說歸讀吾書然後知吾道之大
體用之全如此於易得入德之門焉作復齋銘聖傳

論可以見吾志矣

東溪集十二卷

案文獻通攷
作二十卷

迪功郎漳浦高登彥先撰考試潮州策問忤秦相謫死

緡經堂集八卷

知盱眙軍東平畢良史少董撰文簡公士安五世孫
嘗陷敵有從之游者因為圖名緡經寫其訪問紬繹
之狀

藥寮叢藁二十卷

卷十八

太常少卿上蔡謝伋景思撰參政克家之子

巖壑老人詩文一卷

左朝請大夫洛陽朱敦儒希真撰初以遺逸召用嘗
為館職既挂冠秦檜之孫壘欲學為詩起希真為鴻
臚少卿將使教之懼禍不敢辭不久秦亡物論少之
合有全集未見

鶴溪集十二卷

辟雍博士青田陳汝錫師字擬紹聖四年進士持節
數路帥越而卒青田登科人自汝錫始希點子與其
孫也

岳武穆集十卷

樞密副使鄴郡岳飛鵬舉擬飛功業偉矣不必以集
著也世所傳誦其賀和議成一表當亦是幙客所為
而意則出于岳也

漢濱集六十卷

參政襄陽王之望瞻叔撰周益公為集序

玉山翰林詞草五卷

尚書玉山汪應辰聖錫撰紹興五年進士首選本名
洋御筆改賜天材甚高而不喜為文謂不宜敝精神
於無用然每作輒過人以天官兼翰苑近二年所撰
制詔溫雅典實得王言體朱晦翁稱為近世第一

太倉稊米集七十卷

樞密編修宣城周紫芝少隱撰自號竹坡居士

白蘋集四卷

右文林郎單父龐謙孺祐甫撰莊敏公籍之曾孫用
季父恩仕不遂而死韓南澗志其墓嘗客居吳興故
集名白蘋

南澗甲乙藁七十卷

吏部尚書潁川韓元吉无咎撰門下侍郎維之元孫
與其從兄元龍子雲皆嘗試詞科不利居廣信溪南

案廣信原本作廣德誤
今據文獻通攷改正

號南澗

艇齋雜著一卷

南豐曾季狸裴父撰輦之弟曰湘潭主簿宰宰之孫
曰大理司直晦之季狸其子也少從呂居仁徐師川
遊嘗一試禮部不中乾淳間名公多敬畏之具見其
子維所集師友尺牘此編蓋其議論古今之文辭質
而義正可以得其人之大略

溪園集十卷

蘄春吳億大年撰其父擇仁為尚書億仕至靜江倅

居餘干有溪園佳勝世傳其樓雪初銷詞為建康帥
晁謙之作

于湖集四十卷

中書舍人歷陽張孝祥安國撰甲戌冠多士出思陵
親擢秦相孫璵遂居其下秦忌惡之以他事下其父
子大理獄明年秦亡上旣素脊不五年登法從阜陵
尤脊之不幸不得年死時財四十餘上嘗有用不盡
之歎其文翰皆超逸天才也

南軒集三十卷

侍講廣漢張栻敬夫撰魏忠獻公浚之長子當孝宗朝以任子不賜第入西掖者韓元吉劉孝韙其入經筵則栻也

王司業集二十卷

案文獻通攷作三十卷

國子司業宛丘王逯致君撰建炎初其家避亂沿汴南下逯年十一偶小泊登岸敵適至亟解維不暇顧遂失之在金十年間闕得歸其父工部尚書僕也既

歸入太學登癸未科為諫官御史歷麾節終于少司
成

浮山集十六卷

左朝請大夫江都仲并彌性撰紹興壬子進士晚丞
光祿寺得知蘄州并嘗倅湖籍中有所盼為作生朝
青詞好事者傳誦之遂漏露坐謫官其訓詞畧曰爾
為瀆侮之詞曾弗知畏天其知畏吾法乎吾鄉前輩
能道其事如此

金少府公集卷十八
小醜集十二卷續集三卷

直秘閣眉山任盡言元受撰元符諫官伯雨之孫紹興從臣申先之子乙卯甲科仕為太常寺主簿終于閩憲

拙齋集二十二卷

校書郎候官林之奇少穎異之奇學于呂本中而太史祖謙學于之奇其登第當紹興卒年已四十未幾即入館方鄉用而得末疾

霜傑集三十卷

德興董穎仲達撰紹興初人從汪彥章徐師川游彥

章為作序

妙筆集四十卷

案文獻通考
妙筆作妙峯

中書舍人福清林邁述中撰元符三年甲科苗劉之
變在西掖不失節思陵嘉之終龍圖直學士

鄧峰真隱漫錄五十卷

丞相文惠公四明史浩直翁撰

諡癡符二十卷

御史臨海李庚子長撰諡之義銜鬻也市人鬻物于

市誇號之曰諡

原註
去聲

此三字本出顏氏家訓以譏無

才思而流布醜拙者以名其集示謙也庚乙丑進士
以湯鵬舉薦辟入臺家藏書甚富

梯雲集二十五卷

中書舍人資川趙逵莊叔撰卒未大魁有氣節四十

一歲卒

海陵集三十二卷

同知樞密院海陵周麟之茂振撰乙丑進士戊辰詞
科既執政被命使金亮辭行得罪去

胡獻簡詞垣草四卷

禮部尚書會稽胡沂周伯撰

介庵集十卷

左司郎官趙彥端德莊撰乾淳間名士也嘗宰餘干
趙忠定其邑人初冠多士德莊在朝往謁謝德莊語

之曰謹勿以一魁先置胸中可謂名言

石湖集一百三十六卷

參政吳郡范成大致能撰初以起居郎使金附奏受
書事抗金主於其殿陛間歸而益被上眷以至柄用
石湖在太湖之濱姑蘇臺之下去城十餘里面湖為
堂號鏡天閣又一堂扁石湖二字阜陵宸翰也今日
就荒毀更數年恐無復遺跡矣頃一再過之為之慨
然

周益公集二百卷年譜一卷附錄一卷

丞相益文忠公廬陵周必大子充撰一字宏道其家
既刊六一集故此集編次一切視其凡目其間有奉
詔錄親征錄龍飛錄思陵錄凡十一卷以其多及時
事託言未刊人莫之見鄭子敬守吉募工人印得之
余在莆田借錄為全書然猶漫其數十處益公自號
平園叟

渭南集三十卷

案文獻通考
作二十卷

劔南詩藁續藁八十七卷

華文閣待制山陰陸游務觀撰左丞相之孫紹興末
召對賜出身隆興初為樞密院編修官鄉用矣坐漏
泄省中語阜陵以為反復斥遠之後以夔倅入蜀益
自放肆不護細行自號放翁在蜀九年乃歸晚由嚴
陵召為南宮舍人將內禪益公薦直北門上終不用
及韓氏用事游既挂冠久矣有幼子澤不逮為侂冑
作南園記起為大蓬以次對再致仕嘉定庚午年八
十六而終游才甚高幼為曾吉父所賞識詩為中興

之冠他文亦佳而詩最富至萬餘篇古今未有故文
與詩別行渭南者封渭南縣伯

復齋制表二卷

刑部侍郎王和嘉叟撰初寮安中之孫紹興乾道間
名士也陸放翁與之厚善

盤洲集八十卷

丞相文惠公鄱陽洪适景伯撰忠宣之長子方奉使
時文惠甫十三歲後與其弟遵同中壬戌宏博科本

名造後改焉又三年乙丑弟邁繼之世號三洪其自
淮東總領入為太常少卿一年而入右府又半年而
拜相然在位僅三閱月為林安宅所攻而去嘗一帥
越閒居十六年而終

小隱集七十卷

樞密文安公洪遵景嚴撰其進用最先于兄弟而得
年不永薨於淳熙元年

野處類藁一卷

案文獻通
攷作二卷

翰林學士文敏公洪邁景廬撰其全集未見

誠齋集一百三十三卷

寶謨閣學士文節公廬陵楊萬里廷秀撰當淳熙末
為大蓬論思陵配饗不合去及韓侂胄用事召之卒
不至自次對遷至學士聞開禧出師不食而死自作
江湖集序曰予少作有詩千餘篇至紹興壬午皆焚
之大概江西體也今所存曰江湖集者蓋學后山及
半山及唐人者也

案自作江湖集序以下一段原本脫去今據文獻通攷增入

程文簡集二十卷

吏部尚書新安程大昌泰之撰每卷分上下其實四十卷也博學長於攷究著述甚多皆傳于世

樵隱集十五卷

信安毛玕平仲撰禮部尚書友之子負才傲世仕止州倅與尤遂初厚善臨終以書別之囑以志墓延之既為銘又序其集

梁谿集五十卷

禮部尚書錫山尤袤延之撰家有遂初堂藏書為近
世冠

鄭景望集三十卷

宗正少卿永嘉鄭伯熊景望撰

歸愚翁集二十六卷

秀州判官鄭伯英景元撰近世永嘉學者推二鄭伯
熊紹興乙丑進士自隆興初為館職王府東宮官至
少司成宗正鄉用矣每小不合輒乞去卒於建寧守

伯英癸未甲科第四人以親養三十年不調竟不出
二人皆豪傑之士也

晦庵集一百卷紫陽年譜三卷

待制侍講文公新安朱熹元晦撰年譜昭武李方子
公晦所述其門人也

習庵集十二卷

戶部侍郎曾逮仲躬撰文清公幾之子

東萊呂太史集十五卷別集十六卷外集五卷附錄三

卷

著作郎東萊呂祖謙伯恭撰其弟祖儉編錄凡家範
尺牘之類總之別集策問宏詞程文之類總之外集
年譜遺事則見附錄太史曾文清外孫隆興癸未鎖
廳甲科宏詞亦入等仕未達得末疾奉祠年財四十
五卒于淳熙辛丑平生著述皆畧舉端緒未有成書
者學者惜之

大愚叟集十一卷

太府寺丞呂祖儉子約撰祖謙弟也慶元初上封事
論救祭酒李祥謫高安以沒寓居大愚寺故以名集
千巖擇藁七卷外編三卷續編四卷

知峽州三山蕭德藻東夫撰嘗宰烏程後遂家焉楊
誠齋序其集曰近世詩人若范石湖之清新尤梁谿
之平淡陸放翁之敷腴蕭千巖之工緻皆余所畏也
濟溪老人遺藁一卷

通判明州濟源李迎彥將撰永嘉周浮止先生之壻

與先大父為襟袂集中有送先君子赴戊子秋試詩
首句籍甚人言易已東蓋先君治易故也集序周益
公作

訢庵集四十卷

案文獻通考
訢庵作沂庵

新津任淵子淵撰紹興乙丑類試第一人仕至潼川
憲嘗註山谷后山詩行於世新津有天社山故稱天
社任淵

方舟集五十卷後集二十卷

資陽李石知幾撰石有盛名於蜀少嘗客蘇符尚書
家紹興末為學官乾道中為郎歷麾節皆以論罷趙
丞相雄其鄉人也素不善石石以是晚益困其自叙
云宋魑魯倉今猶古也

歸愚集二十卷

吏部侍郎葛立方常之撰勝仲之子丞相邨之父也
以郎官攝西掖忤秦相得罪更化名用言者又以為
附會沈該罷去遂不復起

綺川集十五卷

太常寺主簿歸安倪偁文舉撰紹興八年進士齊齋之父

象山集二十八卷外集四卷

知荆門軍金谿陸九淵子靜撰與其兄九齡子壽乾淳間名士也象山在貴溪結茅其上與士友講學山形如象故名

施正憲集六十七卷外集二卷

案外集文獻通考作三卷

知樞密院廣信施師點聖與撰其在政府六年上眷
未衰慨然勇退引去不可回識者壯其決趙南塘汝
談其壻也為序其集而傳之

適齋類藁八卷

奉新袁去華定卿撰

案文獻通考
攷作宣卿

紹興乙丑進士改官

知石首縣而卒善為歌詞嘗賦長沙定王臺見稱於
張安國為書之

梅溪集三十二卷續集五卷

案梅溪集下原本無卷
數今據文獻通攷補正

詹事樂清王十朋龜齡撰丁丑大魁立朝剛正劉珙

作序

案末句原本脫去今據文獻通攷增入

酒隱集三卷

宣州司理趙育去病撰其父鼎臣承之號竹隱畸士者也

四六類藁三十卷

起居郎建安熊克子復煥皆四六應用之文也亦無過人者克以王丞相季海薦驟用王時在樞府趙溫

叔當國莫知其所從來頗疑其由徑沮之而上意鄉之不能回也

拙庵雜著三十卷外集四卷

工部侍郎東平趙礪老渭師撰門下侍郎野之姪以婦翁歐陽懋待制澤入仕從范石湖使金虞丞相并父亦薦之遂擢用知臨安坐殿司招兵事謫饒州雙溪集二十卷

知郴州東陽曹冠宗臣撰由舍選登甲科坐為秦檜

假手奪官再赴廷試得初品

止齋集五十三卷

宋文獻通攷作五十二卷

中書舍人永嘉陳傅良君舉撰三山本五十卷

水心集二十八卷拾遺一卷別集十六卷

吏部侍郎永嘉葉適正則撰淮東本無拾遺編次亦不同外集者前九卷為制科進卷後六卷號外藁皆論時事末卷號後總專論買田贍兵

邱文定集十卷拾遺一卷

金方氏 卷十八
樞密江陰邱宙宗卿撰隆興癸未進士第三人其文
慷慨有氣而以吏能顯故其文不彰

趙忠定集十五卷奏議十五卷

丞相福公趙汝愚子直撰別本總為一集亦三十卷
龍川集四十卷外集四卷

永康陳亮同父撰少入太學嘗三上孝廟書召詣政
事堂宰相無宏度迄報罷後以免舉為癸丑進士第
一未祿而卒所上書論本朝治體本末源流一時諸

賢未之及也亮才甚高而學駁其與朱晦翁往返書
所謂金銀銅鐵混為一器者可見矣平生不能詩外
集皆長短句極不工而自負以為經綸之意具在是
尤不可曉也葉適未遇時亮獨先識之後為集序及
跋皆含譏誚識者以為議

軒山集十卷

樞密使獻肅公濡須王藺謙仲撰淳熙乙未駕幸太
學藺為武學諭在班列中人物偉然上一見奇之自

是擢用馴至執政其在經帷論官僚攀附而登輔佐者挾數用術道諛濟私陳義凜然嘉定以來其子孫不敢求仕亦不敢請諡至端平乃得諡

合齋集十六卷

秘書少監永嘉王柟木叔撰乾道丙戌進士在永嘉諸老最為先登其容貌偉然襟韻灑然雖不以文自鳴而諸老皆推敬之

兼山集四十卷

端明殿學士劔門黃裳文叔撰在嘉邸最久備盡忠益甲寅御極未及大用病不能朝士論惜之

攻媿集一百二十卷

參政四明樓鑰大防撰隆興癸未省試考作賦魁以犯諱當黜知舉洪文安遵奏收寘末甲首

案原本寘字下闕今

據文獻通攷校補

齊齋甲藁二十卷乙藁十五卷翰林前藁二十卷後藁二卷掖垣詞草二十卷兼山論著三十卷附錄五卷年

譜一卷

禮部尚書歸安倪思正父撰丙戌進士戊戌宏詞受
知阜陵蚤登禁直紹熙間遂位法從立朝剛介不苟
合慶元嘉定屢召屢出嘗言與其為有瑕執政寧為
無瑕從官由是名重天下端平初詔以先朝遺直得
諡文節

晦巖集十二卷

秘書丞鹽官沈清臣正卿撰嘗為國子錄有薦于朝

欲得召試執政有發笑者曰安有張子蓋女壻而可
為館職者乎遂罷欲為奇節以蓋之曾王希呂為諫
官上書力言其不可孝宗大怒時相虞允文惡沈介
下清臣大理風使引介不從謫封州晚乃召用勸孝
宗力行三年喪為翊善嘉邸以直諒稱初從張無垢
學後居霄川自嶺南歸開門受徒動以聖賢自命效
禪門入室規式與其徒問答下語不契輒使再參頗
為人所譏

靜安作具十四卷別集十卷

清江徐得之思叔撰與其子筠孟堅同甲辰進士次子天麟仲祥亦乙丑甲科其家長於史學

定齋集四十卷

寶謨閣直學士蔡戡定夫撰君謨四世孫丙戌甲科

東江集十卷

丞相臨海謝深甫子肅撰

小山雜著八卷

知樞密院龍泉何澹自然撰

慈谿甲藁二十卷

寶謨閣直學士慈谿楊簡敬仲撰

鈍齋集六十卷

著作郎唐安楊濟濟道撰淳熙五年進士京鏜帥蜀
上已出遨濟為樂語首云三月三日豈無水邊麗人
一詠一觴亦有山陰禊事又云良辰美景賞心樂事
四者難并崇山峻嶺脩竹茂林羣賢畢至一時傳誦

京為相召入館權郎出知果州而終

周氏山房集二十卷後集二十卷

秘書省正字吳郡周南南仲撰南有聲學校庚戌登
甲科而仕不偶再入館再罷以殿廷所授文林郎終
焉

二松集十八卷

案文獻通攷二松作三
松宋史藝文志不載

廬陵王子俊才臣撰周益公楊誠齋客以列薦補官
入蜀為成都帥幕

橫堂小集十卷

右司郎中福清林楠子長撰

潔齋集二十六卷後集十三卷

案後集文獻通攷作十二卷

禮部侍郎四明袁燮和叔撰

北山集略十卷

直龍圖閣三山陳孔碩膚仲撰全集未傳

育德堂外制集八卷內制集三卷

兵部尚書永嘉蔡幼學行之撰成童穎異從同郡陳

傅良君舉學治春秋年十七試補上庠首選陳反出
其下明年陳改用賦冠監舉而幼學為經魁又明年
省闈先多士而傅良亦為賦魁一時師弟子雄視場
屋莫不歆艷

止安齋集十八卷

太府寺丞三山陳振震亨撰

西山集五十六卷

參政浦城真德秀希元撰

平齋集三十二卷

翰林學士於潛洪咨夔舜俞撰

退庵集十五卷

提轄文思院龍泉陳炳撰

梅軒集十二卷

奉化丞山陰諸葛興仁叟撰

遁思遺藁六卷事監韻語三卷

永康呂皓子陽撰遁思其庵名後溪劉光祖德修為

作記當淳熙中救匭救父兄之難朝奏上夕報可一時非辜盡得清脫其書辭甚偉然非孝廟聖明安能照覆盆之下哉

劉汝一進卷十卷

諫議大夫吳興劉度汝一撰度嘗應大科此其所業也策曰傳言論曰鑑古各二十五篇

唯室兩漢論一卷

吳郡陳長方齊之撰紹興八年進士

鼎論三卷時議一卷

三山何萬一之撰隆興元年進士仕為都司知漳州治述十卷

從政郎鄭湜紹興元年擢進按丙戌榜有三山鄭湜溥之是年已為秘書郎面對劄子剴切通練于今傳誦此當別是一鄭湜耶

廬山雜著一卷

知南康軍錢聞詩撰

開靜治本論五卷將論五卷

知樞密院廣陵張巖肖翁撰

閨秀集二卷

建安徐氏撰徐林穉山之從姑祥符勅頭

案唐時舉宏詞第一

謂之勅頭原本勅訛作初又脫去頭字今據文獻通攷改正

奭之姪孫女嫁括蒼

祝璣璣為部使者有子曰永之嘗知滁州

直齋書錄解題卷十八